

He Whakatau

Me mātua pānui kia mārama rawa koe ki ngā whārangi 8–14 o tēnei pukapuka.

He whakarāpopoto

Pānuitia te whakarāpopoto ki te ākonga. I haere koe ki te marae ki tētahi hui? He aha te kaupapa o te hui? Kei roto i te pukapuka *I Te Marae* ētahi momo hui me ētahi momo haka.

He kupu whakataki

Kia kaha ki te whakamahi i ngā wheako me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou me te āta whakamahi i te papa kupu, whakairo kupu rānei me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

Matapakia tēnei mea te haka.

He aha ngā momo hui rerekē, ngā wā rerekē hoki e tika ai, ki ngā whakaaro o te ākonga, kia hakaina te haka?

Kōrero mō te haka hei āhua whakanui tangata, mahi rānei.

He Matapaki

Tirohia te pai o te pānui a te ākonga


I te wā o te matapaki, me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e mārama ana, mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga ki te titiro ki mua, ki te matapae hoki, i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini ripene kōrero, i tōna kotahi rānei;



- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. He aha ngā momo hui i roto i te pukapuka?
2. I tū aua hui i hea?
3. I aha ngā tamatāne i ia hui?
4. Nā te aha ngā tamatāne i haka ai?
5. Ki ōu whakaaro, he aha te tikanga o te kianga “Ka mau te wehi!”?

Ngā whakautu ki ngā whakapuaki māramatanga

1. He huritau, he tangihanga, he hura kōhatu, he whakapai i te wharenuī.
2. I te marae.
3. I haka rātou.
4. Ka rerekē ngā whakautu.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

Te pūtake

T He whakaroa atu i ngā mōhiotia mai i te pukapuka.

He whakatakinga ā-roto, he whakaharatau

I mua i te pānui i te pukapuka, kōrerorerotia ngā momo hui rerekē – ngā mea ōkawa, ōpaki hoki. He aha ētahi momo mahi ka kitea pea i aua momo hui?

Kia ōti i te ākonga te pukapuka te pānui, matapakia ngā kare ā-roto ka whakakitea pea e ngā tamatāne i roto i ngā haka. Kōrero mō ngā momo haka rerekē me te hiahia kia arotau ngā kupu me ngā mahi ā-tinana ki te wā.

Matapakia te tikanga o te kianga “Ka mau te wehi!” Ki te ākonga, kei te mihia te aha, a wai rānei? He aha ai? Kei te mōhio ia ki ētahi atu kianga whakanui?

Whakamahia ai te haka hei whakanui i tētahi tangata, i tētahi mahi rānei (hei tauira: i ngā whakapōtaetanga, i ngā whakawhiwhinga tohu rānei). Matapakia ētahi atu āhua e whakanui ai ētahi atu ahurea i ngā tāngata, i ngā mahi rānei.